

Uvodnik

Pred vama se nalazi novi broj lista *Novi muallim* koji je karakterističan po nekoliko elemenata. Prije svega, uočljiva je nota da se u ovom broju nalazi značajan broj radova koji nastoje egzaktnim metodama istraživati našu religioznost i druge fenomene. Ma šta mi mislili i ma kako je doživljavali, naša religioznost prolazi stalne mijene. Na nju utječu mnogobrojni faktori i transformiraju je u pravcima koji su nam nepoznati. Druga je stvar što te promjene teku dosta sporo i kao što ne vidimo kretanje kazaljki na satu kada stalno u njega gledamo, tako i te promjene bez mjerljivih vrijednosti ostaju teže primijećene. Važno je također istaći znatan udio novih i mladih istraživača u ovom izdanju koji se do sada nisu javljali u našem časopisu. Time je broj naših saradnika i kvalitet saradničke mreže našeg lista dodatno osnažen. I još je jedna stvar prepoznatljiva u ovom broju. Naime, primjetan je veliki broj žena autorica, što nas svakako raduje. U rubrici *Putokazi* nalazi se rad Harisa Islamčevića “Bosansko-hercegovački muslimani pred izazovom *Novo misli*: primjer muslimana Sanskog Mosta”. U ovom radu autor vrši terensko istraživanje evolucije razumijevanja nekih teoloških koncepata u skladu sa određenim savremenim utjecajima. Autor dokazuje da naše klasične doktrine doživljavaju stanovite distorzije, što nas obavezuje na pažnju i odgovornost. U rubrici *Sagledavanja* ponudili smo vam rad dviju univerzitetskih profesorica, Almire Isić-Imamović i Anele Hasanagić. Autorice nastoje kvantitativnom istraživačkom paradigmatom ispitati psihološke aspekte religijskog iskustva mladih u islamskoj molitvi tj. namazu. Autorice dokazuju da obavljanje namaza proizvodi niz pozitivnih efekata na psihološki profil korisnika, kao što su osjećaj unutarnjeg zadovoljstva, pozitivna samopercepcija, osjećanje prihvatanja itd. U istoj rubrici smo ponudili i rad koji pripada području studija genocida autora Murata Seidovića “Hronika zločina počinjenog 8. augusta 1992. godine na prostoru mjesne zajednice Vikoč u općini Foča”. Kako sam naslov sugerise, autor za predmet svog istraživanja uzima jedan mikroprostor i jedan dan u cjelokupnoj hronologiji zločina u istočnoj Bosni. Za razliku od mnogobrojnih radova koji tretiraju cjelinu događanja i daleko širi prostor, autor svoj fokus sužava na mnogo uži vremenski i prostorni okvir, što držimo jako važnim.

U rubriku *Muallim* smjestili smo nekoliko korisnih radova. Prije svega, tu je rad Edina Tulića “Neverbalna komunikacija nastavnika kao vid motivacije učenika”. Motivacija učenika ili preciznije odsustvo motivacije predstavlja sve izraženiji problem, što nas obavezuje na iznalaženje modela motiviranja učenika u cilju poboljšanja ukupnih rezultata nastavnog procesa. U istoj rubrici je i rad Belme Alić “Školski uspjeh učenika”, koji propituje značenje školskog uspjeha djece i faktore koji mogu utjecati na uspjeh, kao što su roditeljski stilovi, lične i druge karakteristike nastavnika, vršnjaci učenika ali i njegova ličnost. U istoj rubrici se nalazi i rad Hajdarević Faruka “Allah želi da se pomazemo, nastavna priprema za sat”. U rubrici *Historija obrazovanja* naći ćete jedan, po nama izuzetno važan rad. Riječ je o radu Mine Kujović “Konferencije za stručno i ideološko uzdizanje bosanskohercegovačkih učitelja i učiteljica (1943-1951).” Autorica na temelju izvorne arhivske građe istražuje jednu važnu etapu u historiji našeg obrazovanja koja je definirala ideološku matricu obrazovnog procesa socijalističke Jugoslavije. Rubrika *Islamske teme* započinje radom Amele Delić “Pitanje konačnog suvereniteta kroz prizmu dva klasična i dva moderna tefsira”. Autorica propituje odnos spram pitanja suvereniteta u okviru islamske političke misli i one savremene koja suverenitet daje isključivo narodu. Ona to čini kroz vizuru i komparaciju ovog pitanja u klasičnim i savremenim tefsirima. U istoj rubrici je i rad “Kur’anski primjeri” koji je ustvari prijevod ulomka knjige *Jasni dokazi u kur’anskim naukama* klasičnog autora Bedruddina ez-Zerkešija. Prijevod je uradio hfz. Nedžad Čeman. U rubrici *Muallimov esej* naći ćete rad “Porijeklo Roma i običaji vezani za smrt kod bijeljinskih i zeničkih Roma” Amele Dedić. S obzirom na to da rad propituje važnu etničku manjinu u Bosni i Hercegovini i to zajednicu o kojoj imamo vrlo malo znanja i malo kvalitetnih istraživanja, ovaj rad smatramo vrijednim. U istoj rubrici je i rad Avdije Hasanovića i Merime Efendić “Hidžaska željeznica u arebičkoj štampi”. Fokus rada je na značaju i historijatu hidžaske željeznice i recepciji ovog megaprojekta u arebičkoj štampi tj. onoj štampi koja je pisala na arebici. I na kraju, kao prilog imamo veoma vrijedan rad Muhameda Tajiba Okića “Mevludi na različitim jezicima i prijevodi mevluda Sulejmana Čelebija” u prijevodu Dženana Hasića. Rad je vrijedan iz dva razloga. Prije svega zbog činjenice da nam približava iznimno dragocjenog autora sa naših prostora. I drugi razlog je što se radi o najcjelovitijoj studiji o historijatu mevluda do danas.

Hfz. Mevludin Dizdarević